

Segun Fundacion Lotto pa Deporte:

Corte a proteha deporte di metemento politico



ORANJESTAD - Den un sentencia di Corte di Prome Instancia, Hues a duna Fundacion Lotto pa Deporte rason den e caso cu a entama contra gobierno di Aruba y Minister Dangui Oduber di Turismo, Salubridad Publico y Deporte, pa decisionnan tuma cu ta afecta operacion di e fundacion. Corte, despues di evalua e caso pa lunanan largo, a para banda di e Junta di Supervision di Fundacion Lotto pa Deporte (FLPD) den e caso trata den "Bodemprocedure". Cu esaki e fundacion ta considera cu e hues ta proteha deporte di metemento politico.

E opinion ey ta bin despues di lesa e consideracion di e magistrado. Den un sentencia historico, cu probablemente lo sirbi den futuro como "ehempel" den Reino Hulandes pa con ta atende e relacion entre gobierno y fundacionnan, Corte a subraya e rol di Minister den maneho di un fundacion. Hues a tuma su tempo pa revisa e "reglanan di weg" basa riba e miho forma di "good governance". Basicamente e Hues a bisa cu Minister tin poder, pero limita y pio pa practica politica partidista.

Corte no a bay di acuerdo cu gobierno, cu a hustifica su decision pa retira e Junta di Supervision, pasobra gobierno a cambia. Basicamente a bisa Hues cu a kita hende di AVP pa pone esunnan di MEP, cu si e por confia. Ta obvio cu e Minister nobo no a

tene cuenta cu e cambianan den statuto di e fundacion, den cual a percura pa dos nivel den gerencia, esta e "Junta Directiva" y riba esey e "Junta di Supervision". Nan ta apunta pa un periodo defini y, como tal, no ta mara mas na periodo di gobernacion. Miembronan di e Junta di Supervision mester por traha cu cualkier gobierno na mando. Durante tratamento di e caso, FLPD a proba Hues cuanto biaha a manda carta pa pidi pa sinta cu e Minister pa tende di su maneho y vision pa deporte, pa tene su maneho na cuenta den e plannan. Sinembargo, Minister nunca a desea di comparti su plannan sino solamente a exige e Junta di Supervision pa nan tuma retiro. Al contrario, a acusa nan di hopi asunto robes y hasta cataloga nan como un "cartel".

Consecuentemente, FLPD a pidi Corte pa:

- Elimina e decision di Minister Dangui Oduber di dia 3 di januari 2018 pa retira e Junta di Supervision
- Elimina e decision di Minister Dangui Oduber di dia 10 di januari 2018 pa nombra miembronan nobo den e Junta di Supervision
- Ordena Minister pa paga e gastonan relaciona cu e caso den Corte.

Den su sentencia, Hues a considera cu FLPD tin motibo valido pa bringa e caso den Bodemprocedure. Gobierno den su demanda a pidi pa declara e

fundacion no admisibel. E magistrado a tene cuenta cu Minister tin e autoridad pa retira miembro di Junta di Supervision, pero mester di un motibo valido. Djis pasobra ta pensa cu nan tin otro escogencia politico, no ta cuadra cu reglanan di bon gobernacion. Mester duna nan oportunidad pa traha y den caso cu nan nenga di traha cu deseonan di gobierno, loke no por a comproba avo, e ora por yega na semehante decision.

Miembronan di Junta di Supervision di FLPD ta masha contento cu e sentencia di Hues y ta considera cu Corte a scoge pa defende deporte y wanta politica leu. Ta un hecho cu politica mester adapta na deporte y no vice versa. No tin necesidad di cambia algo cu ta bon. Ta bisa esaki si considera cu e directiva actual a hereda un Fundacion na rand di bancarota y den e ultimo decada a casi redobla e entradanan di e loteria.

Nota di redaccion:

Nos a tuma nota cu FLPD a omiti di menciona cu a demanda tambe na Corte cu e Ministro mester laga e Junta di Supervision traha tranquil, sin stroba nan. Hues a rechasa e demanda aki argumentando cu e facultad cu e Ministro tin pa retira miembro di e Junta di Supervision, ta haci cu e Ministro por haci pregunta na e Junta pa por husga si e Junta ta cumpli debidamente cu su tarea. Den esey ambos partido lo mester comporta nan mes segun rasonabilidad ta rekeri.